

MOJA, TVOJA
**NAŠA
ZEMLJA**
★★★★★

SIGURNOST NEMA ALTERNATIVU

**NAŠA
STRANKA**

Zapošljavanje

U Bosni i Hercegovini egzistira 16 agencija za provođenje zakona, kolokvijalno, policijskih tijela, pozicioniranih na tri nivoa:

- Državni nivo – tri agencije (Agencija za istrage i zaštitu Bosne i Hercegovine, Granična policija Bosne i Hercegovine i Agencija za koordinaciju policijskih tijela Bosne i Hercegovine),
- Srednji ili entitetski nivo – tri agencije (Federalno ministarstvo unutrašnjih poslova, Ministarstvo unutrašnjih poslova Republike Srpske i Policija Brčko Distrikta Bosne i Hercegovine),
- Lokalni nivo – 10 agencija (kantonalna ministarstva unutrašnjih poslova u Federaciji Bosne i Hercegovine).

Trenutno ne postoji zakonom propisani hijerarhijski odnos među agencijama, kako na državnom, tako ni na nivou entiteta Federacija Bosne i Hercegovine.

Osim nepostojanja zakonom propisanih hijerarhijskih odnosa, ni sama organizacija rada, strukturalizacija i finansiranje nisu postavljeni jednako i homogenizirano na prostoru Bosne i Hercegovine. Policijske snage na državnom, federalnom i kantonalnom nivou su organizovane kao upravne snage unutar ministarstava, a u RS-u su integrisane u Ministarstvo unutrašnjih poslova RS-a.

Finansiranje i organizacija policije na državnom, federalnom i kantonalnom nivou je zakonom zagarantovana neovisno od ministarstva i politike, dok se u RS-u ministar pita za većinu finansijskih pitanja, ali je i duboko informisan o radu i djelovanju MUP-a. Uspostavljena organizacija na državnom, federalnom i kantonalnom nivou je bolja, jer nudi kakvu-takvu mogućnost neovisnosti uprave policije od političke volje. Politička neovisnost policije je ključna pretpostavka za izgradnju pravne države i borbu protiv korupcije i kriminala.

Također, postoji organizacijska razlika u smislu uspostavljanja strukture između policijskih uprava u FBiH i u RS-u, u smislu centralizacije/decentralizacije aktivnosti, što otežava organizaciju i komunikaciju građana s policijskim službama.

Politike Naše stranke u kontekstu podrške operativnom policijskom sastavu, kao i unapređenju zakonske regulative koja reguliše odnos policije i društvene zajednice, te usklađivanje domaćeg s evropskim zakonodavstvom u oblasti unutrašnjih poslova i policije, ogledaju se u sljedećem:

- Pružanje pune podrške operativnom policijskom sastavu u kontekstu popune i opremanja i osiguranja projektovanih budžeta za funkcionisanje operativnih policijskih snaga, s naglaskom na plate i naknade policijskih službenika i poboljšanje uslova u kojima obavljaju svakodnevne poslove, dužnosti i zadatke,
- Involviranje vlastitih politika u kreirane prioritete i politike, kako ministarstva sigurnosti na državnom nivou, tako i ministarstava unutrašnjih poslova na entitetskom i lokalnom nivou, sve putem parlamentarnih i skupštinskih komisija za sigurnost,
- Definisane politika i prioriteta na osnovu pokazatelja o ukupnim sigurnosnim kretanjima na određenom području,
- Insistiranje na transparentnosti rezultata koje postižu ministarstva unutrašnjih poslova u cjelini, ali i operativne policijske snage u njihovom sastavu,
- Jačanje instituta civilne kontrole policije valorizacijom rezultata koje policija postiže samostalnim planiranjem i realizacijom policijskih aktivnosti, kako u kontekstu realizacije od strane policije postavljenih ciljeva, tako i u definisanju kompatibilnosti tih rezultata sa zahtjevima ili očekivanjima zajednice, artikulisanim kroz djelovanje izabranih dužnosnika.

U kontekstu obaveze usklađivanja domaćeg s evropskim zakonodavstvom, posebno odredbi koje proističu iz 14 ključnih prioriteta koje Bosna i Hercegovina treba da ispuni da bi dobila preporuke za otvaranje pregovora za pristup Evropskoj uniji, potrebno je izvršiti analizu zakonskih rješenja i u skladu s rezultatima napraviti listu prioriteta te inicirati potrebna usaglašavanja i otkočiti proces donošenja idućih zakona kroz propisanu parlamentarnu proceduru:

- Zakon o nabavljanju, držanju i nošenju oružja,
- Zakon o javnom okupljanju,
- Zakon o nedoličnom ponašanju na sportskim terenima,
- Zakon o privatnim detektivima,
- Zakon o prijevozu opasnih materija,
- Zakon o prometu eksplozivnih materija, zapaljivih tečnosti i gasova.

Neophodno je insistirati da se, pored navedenih zakona, insistira na primjenjivanju idućih principa i njihovoj integraciji u naše zakonodavstvo i policijsku praksu, a to su:

- Potpuna politička neovisnost Uprave policije od Ministarstva unutrašnjih poslova i politike. Dodatno preispitivati postupke imenovanja komesara i radne organizacije Uprave policije, kako bi se postigao što veći stepen neovisnosti,
- U cijelosti provesti odredbe Istanbulske konvencije (Bosna i Hercegovina je potpisnik) po pitanju zaštite žena i zaštite porodice od nasilnika. Domaće zakonodavstvo ne obuhvaća prvi dio Konvencije koji se odnosi na zaštitu žena, nego isključivo drugi dio koji se odnosi na zaštitu porodice. Također, u ovom kontekstu, potrebno je utvrditi inkriminaciju nasilja nad ženama koju predviđa Konvencija (silovanje žene od strane partnera ili bračnog partnera, prisiljavanje na prekid trudnoće i sl.) i uvesti je u krivično zakonodavstvo.

■ Uvesti institut „povrat u državljanstvo“.

Ovaj institut postoji u Evropskoj konvenciji o državljanstvu i već je uveden u državama u regionu. Prema ovom institutu lice kojem je prestalo državljanstvo Bosne i Hercegovine, moglo bi, samo uz izjavu da je saglasno, izvršiti povrat državljanstva Bosne i Hercegovine, bez prestanka državljanstva koje je steklo po naturalizaciji. Ovo bi bilo korisno zbog smanjenog prirodnog priraštaja i ostanka u vezi s ljudima koji su imali državljanstvo Bosne i Hercegovine. Predmetna stvar bi se riješila kroz dopunu Zakona o državljanstvu Bosne i Hercegovine ovim institutom.